

**ZAKON O FINANSIJSKOM POSLOVANJU BRČKO
DISTRIKTA BOSNE I HERCEGOVINE**

SADRŽAJ:

ZAKON O FINANSIJSKOM POSLOVANJU BRČKO DISTRIKTA BOSNE I HERCEGOVINE	3
I. OSNOVNE ODREDBE	3
II. FINANSIRANJE POSLOVANJA	3
III. PLAĆANJA I ODRŽAVANJE SOLVENTNOSTI	4
IV. KAZNE NE ODREDBE	6
V. PRELAZNE I ZAVRŠNE ODREDBE	7

U skladu sa članom 23 Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 20-oj sjednici održanoj 30.aprila 2001.godine, usvaja,

ZAKON O FINANSIJSKOM POSLOVANJU BRČKO DISTRIKTA BOSNE I HERCEGOVINE

I. OSNOVNE ODREDBE

Član 1

Ovim zakonom uređuje se finansijsko poslovanje pravnih lica sa sjedištem u Brčko Distriktu Bosne i Hercegovine (u daljem tekstu „Distrikt,„) koja obavljaju djelatnosti utvrđene propisima o standardnoj klasifikaciji djelatnosti.

Član 2

Finansijsko poslovanje, u smislu ovog zakona čini:

1. finansiranje poslovanja,
2. plaćanja i održavanje solventnosti.

II. FINANSIRANJE POSLOVANJA

Član 3

(1) Pravno lice stiče i pribavlja finansijska sredstva:

1. ulaganjem sredstava osnivača u vidu osnovne glavnice nominalnog kapitala i rezervi;
2. emitovanjem i prodajom hartija od vrijednosti u skladu sa propisima;
3. iz rezultata poslovanja;
4. od domaćih i stranih ulagača ;
5. na osnovu zajmova;
6. namjenskim dotacijama;
7. na druge načine u skladu s propisima.

(2) Sticanje i pribavljanje finansijskih sredstava iz stava 1 ovog člana vrši se u skladu sa odgovarajućim zakonima.

Član 4

Obaveze se smatraju dugoročnim ako im je rok dospjeća duži od jedne godine, a kratkoročnim ako im je rok dospjeća do jedne godine.

III. PLAĆANJA I ODRŽAVANJE SOLVENTNOSTI

Član 5

Pravno lice je dužno da obavlja finansijski promet u gotovini odnosno preko računa kod ovlašćenih organizacija za obavljanje platnog prometa (u daljem tekstu: ovlašćena organizacija), u skladu sa Zakonom o platnim transakcijama Brčko Distrikta Bosne i Hercegovine.

Član 6

- (1) Pravno lice je dužno da izmiruje obaveze u ugovorenom odnosno propisanom roku, preko svojih računa, nalogima za prenos i drugim instrumentima plaćanja, uključujući gotovinu, u skladu sa zakonom i drugim propisima.
- (2) Pravna lica mogu plaćati međusobne obaveze prenosom hartija od vrijednosti, prebijanjem, kliringom, asignacijom i na drugi način, u skladu sa zakonima kojima se uređuje ova oblast.
- (3) Izuzetno od odredbe stava 2 ovog člana, pravno lice ne može izmirivati međusobne obaveze prebijanjem, niti na druge načine predviđene propisima o obligacionim odnosima, sve dok ima evidentirane a neizmirene dospjele obaveze po osnovu prinudne naplate i drugih instrumenata obezbjeđenja plaćanja.
- (4) U slučaju da pravno lice ne plaća obaveze po osnovu poreza i doprinosa, poreski organ će izdati nalog za prinudnu naplatu ovlašćenoj organizaciji, putem prenosa sredstava sa računa pravnog lica na odgovarajući račun poreza i doprinosa.
- (5) Ako se na način iz stava 4 ovog člana ne može u potpunosti izmiriti obaveza, poreski organ će donijeti rješenje o prinudnoj naplati iz cjelokupne imovine pravnog lica, odnosno drugog obveznika.
- (6) Troškove koji nastanu po osnovu stava 5 ovog člana snosi pravno lice, odnosno drugi poreski obveznik.

Član 7

U smislu ovog zakona, pravno lice je nesolventno ako na računu kod ovlašćene organizacije nema dovoljno sredstava za isplatu svih naloga, odnosno osnova za naplatu na dan dospjeća.

Član 8

- (1) Ako je pravno lice nesolventno, izvršenje naloga za plaćanje i osnova za naplatu obavlja se po sljedećim prioritetima:

1. nalozi za plaćanje i osnovi za naplatu carina i carinskih dažbina, posebnih poreza - akciza, poreza na promet proizvoda i usluga i drugih poreza, po posebnim propisima;
 2. nalozi za plaćanje i osnovi za naplatu doprinosa iz plata i na plate;
 3. nalozi za plaćanje i osnovi za naplatu ostalih javnih prihoda, po posebnim propisima;
 4. nalozi za plaćanje i osnovi za naplatu po drugim izvršnim odlukama organa uprave i sudskih organa;
 5. nalozi za naplatu po osnovu instrumenata obezbjeđenja plaćanja;
 6. ostali nalozi za plaćanje.
- (2) Redoslijed izvršenja naloga za plaćanje i osnova za naplatu, unutar prioriteta iz stava 1 ovog člana, utvrđuje ovlašćena organizacija na osnovu redoslijeda prijema, a na osnovu prioriteta utvrđenih u stavu 1 ovog člana.
- (3) Nalozi za plaćanje i osnovi za naplatu iz sljedećeg reda prioriteta mogu se izvršavati tek po izvršenju svih naloga za plaćanje i osnova za naplatu iz prethodnog reda prioriteta, uključujući i naloge za plaćanje i osnove za naplatu koji su primljeni u međuvremenu.
- (4) Odredbe ovog člana odnose se i na imaoce računa-preduzetnike i fizička lica, obveznike javnih prihoda u skladu sa propisima, čiji se računi vode kod ovlašćenih organizacija.

Član 9

Ovlašćena organizacija dužna je da vodi evidenciju o redoslijedu prijema osnova za naplatu i naloga za plaćanje istog prvenstva prema danu i satu njihovog prijema i da ih po tom redoslijedu izvršava. Ovlašćena organizacija obavještava povjerioca, na njegov zahtjev, o redoslijedu naplate njegovog potraživanja.

Član 10

Ovlašćena organizacija će jednom mjesečno, a najkasnije do 15-og u mjesecu za protekli mjesec, u svim svojim organizacionim jedinicama javno objaviti i dostaviti „Službenom glasniku Brčko Distrikta Bosne i Hercegovine,, za objavljivanje podatke o nazivu, sjedištu - prebivalištu, adresi i broju računa nesolventnih pravnih i fizičkih lica - imalaca računa koji su sa stanjem poslednjeg dana proteklog mjeseca:

1. nesolventni 30 i više dana neprekidno;
2. nesolventni 90 i više dana neprekidno;
3. nesolventni 15 i više dana u toku prethodnog mjeseca, sa prekidima.

Član 11

- (1) Povjerilac može ugovoriti da mu dužnik preda mjenicu, ček, bankarsku garanciju ili da plaćanje obezbijedi na drugi način u skladu sa zakonom.
- (2) Mjesto, vrijeme i način predaje instrumenata obezbjeđenja plaćanja iz stava 1 ovog člana utvrđuje se sporazumno.

Član 12

Nadzor nad provođenjem odredbi ovog zakona vrši Poreska uprava Brčko Distrikta Bosne i Hercegovine (u daljem tekstu: „Poreska uprava,,).

IV. KAZNE NE ODREDBE

Član 13

- (1) Novčanom kaznom od 1.000 do 5.000 KM kazniće se za prekršaj pravno lice ako izmiruje obaveze na način suprotan odredbama člana 6, stav 3 ovog zakona.
- (2) Za radnje iz stava 1 ovog člana kazniće se za prekršaj i odgovorno lice u pravnom licu novčanom kaznom od 500 do 2.000 KM.

Član 14

- (1) Novčanom kaznom od 1.000 do 10.000 KM kazniće se za prekršaj ovlašćena organizacija:
 1. ako plaćanje ne izvršava po redoslijedu propisanom ovim zakonom (član 8);
 2. ako povjerioca, kada on to zatraži, ne obavijesti o redoslijedu naplate njegovog potraživanja (član 9);
 3. ako na propisani način ne objavi podatke o nesolventnim imaocima računa (član 10).

(2) Za radnje iz stava 1 ovog člana kazniće se za prekršaj i odgovorno lice u ovlašćenoj organizaciji novčanom kaznom od 200 do 1.000 KM.

V. PRELAZNE I ZAVRŠNE ODREDBE

Član 15

Do uspostavljanja Poreske uprave, nadzor iz člana 13 ovoga zakona vršiće Uprava prihoda Brčko Distrikta Bosne i Hercegovine.

Član 16

Stupanjem na snagu ovog zakona, na području Distrikta prestaju da važe svi propisi koji su regulisali oblast regulisanu ovim zakonom.

Član 17

Ovaj zakon stupa na snagu osmog dana od dana objavljivanja u „Službenom glasniku Brčko Distrikta Bosne i Hercegovine,,.

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТ

Bosna i Hercegovina
BRČKO DISTRIKT
BOŠNE I HERCEGOVINE
SKUPŠTINA BRČKO DISTRIKT

Broj:0-02-022-233/01
Brčko,30.april 2001. god.

PREDSJEDNIK

SKUPŠTINE BRČKO DISTRIKTA

Mirsad Đapo,dipl.pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.